

四庫全書

集部

欽定四庫全書

冷然齋詩集卷四

宋 蘇洵 撰

五言律詩

湖中

湘湖夢不到今日到湘湖草木儘春色山川如畫圖  
雨慳萼摘後花發燕飛初張翰平生意扁舟未可無

百家泊

舟子更相語泥深不可行擁裘聽水響無寐到天明  
蓬

背瀟湘雨溪南歎乃聲在家那汝覺數舍許離情

淹泊

淹泊何如此歸來亦偶然江寒惟罩雨船晚各炊煙宿  
鴈起無借飢鳥鳴乞憐遙傳潮入浦孤棹已爭牽

過天章

菜把充詩腹藍輿兀病身山煙孤起晚官柳探生春歲  
月渠催我妻孥爾累人誰言行路好得似在家貧

三峽

三峽波濤壯秋深鼓棹前飛空多隕石失木有驚猿灑  
徧時時雨晴開處處天篙工罷鑼鼓此地出神仙

夢峽

未定還家樂仍思去國情猿枝樓閣影龍府佩環聲水  
漩欹斜碧山搖突兀晴分明昨夜夢百丈峽中行

峽險

剖鑿誰其始山川出秘竒祇應天地設未必鬼神為崩  
石驚船過盤渦逼棹移蓬萊如在眼淚冷掛猿枝

次韻望海亭

城裏偏高處分明見海潮  
鶴巢多碧樹人語半丹霄  
州宅樓臺近居民市井遙  
芳時一來此因得離紛囂

鏡曲

鏡曲非塵世春風屬酒杯  
欲紓憂百結須索醉千回  
蓮實兒拳似紫荊父手栽  
無人競來往坐穩興悠哉

題蠟屐金貂二亭呂巽伯表弟命賦

蠟屐登山去金貂換酒來  
一生須幾兩萬事付三杯  
飲

爾非狂耳歸歟有旨哉何時兩亭暮吾與汝徘徊

三界

地屬元三令風回更幅蒲櫓聲歌枕裏燈影到家初稍  
覺身何有行當夢亦無平生不耕食五斗欲誰辜

風日催曛暮江溪半濁清春寒歸鴈急沙遠落鷗驚有  
志詩書誤無家去就輕短篷局不寐高枕念平生

地壁道中

落日宜平野回車憩薄陰羸牛歸徑險寒雀聚枝深足

未傷和玉文曾賣蜀金百年渠未已出處遂何心

三游洞

懸崖三百丈五里到松門路盡始佳處苔深無屐痕細  
泉牛乳滴亭午艾香溫舟楫經行疾無勞具酒尊

西陵道中

凍纜牽鷗浦炊煙飯驛亭吳雲懷踐白越樹怨聞青年  
數那無老巢居會有寧長歌和漁者愁絕未堪聽

吳淞

把蟹風前醉吟詩水面歌餘年聽造物所嗜獨烟波蘭  
棹憑雙穉菱花笑一皤稽山今又昔賀老苦無多

途次口占三首

草檄頭風愈吟詩瘡鬼藏三年如昨日多難更殊鄉澗  
底秋花小枝頭病葉黃饑餐并困卧平地有仙方  
鼓棹泛瀾茫驅車道莽蒼功名中底用奔走為誰忙白  
浪高揚子青山入建康從來懷古意秋至轉悲涼

棗子萬星攢良苗綠一端撲籃多秀色吹帽受風寒擾



撥水和尚冷冷山藥官近詩差進步安得老梅看

八月十二日再入都

野色連山碧時光似水流鄒陽仍是客李廣不封侯業  
已詩中老何須病始休草根螢一點寂照萬端憂

晚渡

小雨濕詩人人疑過渡頻望山高着眼就樹巧遮身有  
句尋鷗說無家認鶴親明朝上京去釀酒酌溪神

曹娥江

月下傾殘酒風前讀斷碑采江那有意陟岵不無悲樹影經船疾灘聲到枕遲重來更何日放棹欲何之

浙江

演迤來何代崩騰直至今飛潛知險地征逐欠閒心西障殘山渺東流大海深會携秋月色徐聽夜龍吟

若耶溪

歲月去悠悠沙邊一線流榮無嚴子釣直有楚臣鉤雨氣知魚樂煙光驗鳥愁餘年未可料幾度此維舟

長江二首

長江無六月大地絕纖埃暑向風前退秋從雨後來問  
桐知葉落修桂待花開疇昔扁舟興分明欲喚回  
處暑無三日新涼直萬金白頭更世事青草印禪心放  
鶴婆娑舞聽蛩斷續吟極知仁者壽未必海之深

遊子

遊子那無故青春亦有歸小舟衝岸疾白鳥破烟飛物  
理迷終極人生喜願違東南雙病眼隨日下漁磯

曉行

稚子侵煙語征夫破曉行百為真  
有數萬物本同生擾擾歲月晚  
悠悠江海情荒雞叫苑屋一笑  
又天明

過高資丞相墓

先祖當元祐誠心相哲宗開藍  
初不入遺表尚深忠簪笏兒  
孫少松楸盜賊空經從每瞻拜  
何日免飄蓬

拜大父墓

六載今如此青松到屋梁何言  
聲籍籍直作去堂堂事

已難追悔天高只痛傷當時巴蜀使書疏不能忘

望三山放翁居

晚進違前輩湮才重此州絕知他日少預作百年憂樵  
牧非身致聰明不我謀莫令司馬縈祗候茂陵求

泊通明

午夜通明泊朝來自啓蓬驟看潮帶雨還作雪隨風酒  
薄愁無料詩難老未工疎寮有奇士恨不比行同

又約趙大再遊小陽明其山全似峽中點煙一

亭可為吳越之冠

客路心常慰歸樓氣苦低  
經行天柱北夢想雪峯西  
翠壁千巖長蒼煙半點迷  
何當同拄杖重此聽猿啼

出婺城

萬頃平田雪前村昨夜梅  
夢還荊國舊吟欠兔園才  
只作尋詩去何曾為酒來  
茲行得奇事夾道有瓊瑰

歸棹

形役何時已淒涼莫更論  
鴈啼雲背月人語水邊村  
十

月冬猶暖三杯酒易昏悠悠信歸棹今夜宿誰門

雪霽歸湖山過千秋觀少留

縱轡不嫌遠逢山猶一登夕陽波渺渺殘雪塔層層折  
竹橫遮道飢鳥下啄冰欲歸還小駐倚杖對峻嶒

在昔

在昔西游日飄然入劍關酒醒天外驛詩爽峽中山天  
地羈縻久鄉園縞素還不堪明鏡裏重覓舊朱顏

正月二十七日陪唐子蒼登卧龍時稼軒已去

令人懷之

晴雨煙雲態高深會見聞亂山依越定一水向吳分  
元白諸侯表揚王俊士羣春風到紅綠花草總能文

書張氏壁

潮水遲朝渡湖村竟日留肯從沽酒飲故作換書游  
得句因題壁逢人問買州雙鳬應不遠知道客來不

題元真觀屋壁二首

琳宮無俗務書卷得相親樹影自知午碁聲不見人  
實



為蕭爽地甃得自由身客至誰能接應知懶是真  
冬青幹已老栢樹亦蕭蕭紫殿歲年遠黃冠早晚朝井  
甘鄰共汲食寡腹常枵永夜看河漢仙人似見招

玉麟堂上偶成

雨燕飛仍集池荷密復踈無心應人事隨意數遊魚碑  
字千年冷薰風五月初玉麟堂上客曷日賦歸歟

安隱寺詩

樟樹何年種娑娑滿寺門金身虛像設畫壁儘塵昏龍

虎青山遠冰霜碧甃存坊官敬人客頃刻具有尊

題周氏庵

緩步勝騎馬迷塗問跨牛蓴絲方擾擾湖水亦悠悠解  
后因成款淹留却當游旁觀君共我真是兩沙鷗

別湖橋

步轉湖橋晚家園隔斷陂回看猶萬里別去不多時  
子迎風立童兒以杖隨筍輿方坐睡到此忽成詩

三白

大雪平地尺臘中相見三無人堪共賞與壁自高談茗  
事工為崇詩盟弔不咸夢成蝴蝶去飛過百花巖

上清雪

撥雪尋行路推書問枕屏恍登瑤玉府憶在錦官城眠  
少燈相伴愁多酒易醒寒鷄喚清曉匹馬又遐征

餘姚江上夜看殘雪

星斗夜迢迢江空一棹搖亂山詩態活殘雪醉魂消已  
作無懷氏長思有道朝周公夢不見蓬底聽鷓鴣

奉和高秘書雪中雜興

平湖添細碧，統郭看新晴。幸作當年瑞，那無一日情。睡  
魂依酒濁，詩味益茶清。寒事今如許，重捫反舌聲。

次韻馬季思禁體雪二首

滌盡妖氛氣，粧成富貴冬。梅花香處覺人意，火邊濃未  
暖。那飛絮非寒底，見松絕憐堦下竹腰折，為誰恭。

庭樹曉毵毵，行空馬脫驂。瑞臻平地尺，白見一年三。照  
眼花猶散，齊腰話可忝。岑樓尋勝賞，溪泛此何慚。

咏月

入夜金盆上終宵玉鏡懸  
氣涼征戍骨腸斷別離緣皎  
潔寧傷性虛明欲竟天平生  
看不足茲夕更悠然

又一首

既雨中秋望纖毫桂影分  
魄高疑壓霧香動欲衝雲稍  
窘癡蟾窟全驚睡鵲羣孤清  
若箇畔玉笛片時聞

秋風

秋風清入骨秋樹薄於雲  
老去悲時序新來斷句文燕

鴻相背發涇渭一生分信有難言事天高不為聞  
秋風荷葉老秋月桂枝生萬物四時意八荒雙眼明憂  
虞滋疾病治亂閱陰晴秔稻今年少無勞社酒傾

霜露吟

短褐新冬逼中流一棹孤旅程沙泊鴈行色樹穿驢霜  
露悲愁骨功名畏老夫平生知范蠡嘗膽會吞吳

中秋扶病對月

久病頭如石中秋月似盆起瞻惟一色歸卧只空村信

有鄜州見曾同秘省論微吟到河漢桂樹忽飛翻

感秋

索索來何處梧桐昨夜黃蛩聲機杼月鴈影塞垣霜俗  
尚儒餐貴家貧父業荒三秋病消瘦吾興入柴桑

秋感

朱槿不堪留牽牛上竹幽蛩聲清奪漏鷹駟勁思秋掩  
卷悲先指看山憶舊遊閨情兼旅夢百慮五更頭

獨鳥

獨鳥愁歸翮霜寒謝世紛夢遙鄉思局砧急酒醒聞一  
笑胡為爾中年更不羣頗疑當日論飽飯薄能文

乳爵

乳爵機心淺逢人自不飛濶疏羅網事愛惜羽毛稀一  
物知天理他年任布衣相忘容苟免吾與汝無違

老蚌

老蚌吸秋月飢鷹號朔風人生根蒂少物理短長同難  
學纍纍印休書吐吐空餘年見兒態若箇白頭翁



題司馬提舉畫鷹

舊讀少陵句今觀司馬鷹  
風雲千變化天地一飛騰  
側目看枝鳥回身掣臂繩  
何由飲西颢真逐羽毛升

學漁

舟楫蘋花渺江湖喜氣多  
一天飛白雨半夜濕青蓑  
帆轉星初落潮歸鏡欲磨  
平生動中靜安枕信風波

北苑

北苑心無壯南牕眼費明  
病因杯酒見花值客愁生  
落

落知誰合紛紛詎不情未成幽處宅且逐衆人行

老鬢詩

老鬢驚霜覺春容帶雪來散愁詩數首覓醉酒三杯行  
店人歸少荒林鳥去回高情無與共自摘澗邊梅

霜毛

深深四簷雨眇眇一枝燈酒盡獨愁婦家貧全似僧中  
年多感慨同好少交朋自省空諸有霜毛未可憎

即事

新笋看成竹春風去不知  
麥天蠶上早槐日燕飛遲  
褐短偏憐婦家貧更惜兒  
十年霜鬢白未必總因詩

問水詩

頃別知何處重來喜奈何  
望洋誇海谷倒篋注天河  
變化龜文圻淪漪鴨頂波  
白鷗沒浩蕩清興滿吟哦

送三兄出宰常山

官次淹時久才華應世須  
及瓜逢六月行李過三衢  
迂吏江邊少齋裝驛外都  
潮經漁浦夜檣泊富陽晡  
柳障

飛雲合花溪落照孤別情初島淑行色半菰蒲後日思  
家否兼旬到縣無衙新夸綵棟俗厚省鳴枹陸走通閩  
蜀川浮赴越吳往來紛鴈鶩富貴幾金珠故老知名父  
諸公拜畫圖琴聲追舊宥謠詠溢今蘇馴聽桑間雉歡  
瞻屋上烏源流從孔氏操履是顏徒卓魯方如許龔黃  
盍念夫吾儕甘齟齬仕路不崎嶇霜葉省清綬秋蓬類  
白鬚但令民若子何恤吏如奴宰相曾傳業郎官此問  
途入朝端繼軌負郭歟營租女大宜招婿兒單切教渠

箕裘綿代遠門戶更誰扶乃伯偏憐我尊兄况友于中  
年嗟契闊少小事差殊木拱人難作庭懷鯉共趨鵬程  
方衮衮愚意獨區區日者門關隔茲行郡國迂吟風誰  
屬和飲月欠相呼一室甘岑寂回舟思鬱紆儻歸存懶  
拙應與釣耕俱


梅口遣興

屏迹甘衡陋馳書捷置郵繫匏成潦倒行李當嬉遊偶  
往無前約明知不自由米鹽嗔婦問書劒惜兒留頗涉

湖堤遠旋驚野店稠小梅溪側寺踈柳驛邊樓放燒催  
青入瞻山揭翠流鷄籠從勢卓獅卧得形脩花面施家  
說碑顏蠡廟修池冰魚附藻縣早肉垂鈎短景中俄炆  
孤煙散復收數鳬將子出一鴈落聲幽古怪藤妨瓦灣  
碕石礙輶度危還借步揭淺更呼舟栗大封懸屋箕香  
炒貯甌氣豪紛毆擊博負幾喧啾月與星偕隱雲將雪  
共謀拾岩乾憲宰汲澗冷颼颼少飯糲為食無衣紙作  
裘楮艱錢愈瘦吏墨政仍偷橋幻僧伽佛拈傳嶺海囚

舞儼羣畫鬼唱牧和村謳飮坐初嘗蠟比鄰遞解牛門  
符矜鷺詭館泊佐倡優麥種稀稀糝機羅軋軋抽謝媒  
茶褐襖迎婦柿紅毬酒味輕疑水泥途滑過油騎都應  
赴祿輿哭定色憂稍稍更墟市迢迢隔坂丘土風隨變  
易人語欠溫柔倚伏時皆有文章理亦猶本原天意覺  
去就物情求叔世誰青眼當年早白頭生涯湍令拙旅  
次庾郎愁詩好霜侵鬢談高雪在喉極思閑似塚只合  
懶於鳩命豈奔波注官知老病休漫云予有罪寡信彼

堪羞久矣鷗盟杜居然蝶夢周詰朝纔發女曷日到衢  
州





欽定四庫全書



欽定四庫全書

欽定四庫全書

集部

冷然齋詩集卷

五

詳校官庶吉士

臣李傳熊

主事臣呂雲棟覆勘

謄錄監生臣朱起鳳

謄錄監生臣陳遂

欽定四庫全書

冷然齋詩集卷五

宋 蘇洵 撰

七言律詩

上樓大叅

貞元朝士久成空故國靈光但有公四海已遲三日雨  
八荒同在一春風耆年盛德天應相大冊高文老更工  
且為商家了梅事未須海道覓丹東

四朝相業舊儀刑今代衣冠類曉星青眼更誰憐後裔

白頭空復抱遺經冲霄有路開籠鶴  
檄案無時泣卷螢  
吏部觀文均所愛因聲廊廟一丁寧

喜雨和轉庵韻

香霧騰雲滃鬱蒸九重精禱格真清  
連朝潤澤非凡雨  
通國驩呼荷聖情好句便疑從地湧  
勞歌不復和車聲  
鵲鳩屋角休無賴未許尋常喚婦鳴

雨後乞御正殿得請次韻

已成霖雨慰黎蒸聖主齋居尚穆清  
奏許正朝仍玉食

盡回喜色見民情  
衣篝不惜添梅潤  
籤帙從堆亂葉聲  
要雨雨來天便許  
不須更卜白黿鳴

酬王木叔判院喜雨韻

雨在琴書溽更蒸  
雨餘衣袂潤猶清  
良苗日起有佳色  
聖澤天同無靳情  
得句餉耘聊志喜  
欲歌擊缶不容聲  
居然引玉何從至  
敢向黃鐘作釜鳴

四月二十四日喜雨次振之韻

朝來驟雨鬱煩蒸  
晚見疎星掛漢青  
大點忽隨風信入

好聲先覺夢魂聽春過種失農猶及喜極詩成語未停  
每恨買山無醞藉不知肝膽露青萍

劉振之訪別舉似喜雨詩次韻

尺澤霏微起寸陰稍蘇焦槁見青青便疑菽粟中天降  
絕喜階除半夜聽訪我尚期新舊雨話歸還憶短長亭  
交游若問今何似世味諳來似楚萍

喜雨忽風作酬仲歸

觸石興雲走列峰天官日日課分龍有懷競喜神靈雨

無術添驅變化筇枕上佳聲欣濺瀑田間樂事喻號鐘  
連朝風伯何從惡敢不凌兢為肅容

次韻仲歸喜雨有肯顧之意

願試黃昏上古湯社中今得沈東陽素衣肯為緇塵染  
秀句殊增濯頂涼不惜聯翩過舊隱也欣滂沛洗炎光  
預知定得驚人語約略眉間喜氣黃

家國

長安五月火雲堆客子光陰鬢髮催謀國已嗟無位及

憂家只怕有書來  
榴花照眼何曾摘  
萱草驚心不要開  
焉得兒男備征戍  
等閑挈取版圖回

悟前生

秋風拂拂草頭青  
秋日離離萬寶成  
懶把幽懷經俗事  
每因前境悟他生  
謝郎船上魚新買  
賀監湖邊酒細傾  
七十三分今過二  
且然無忤白鷗盟

名節

了知名節重於山  
誰信今人古誼存  
百草前頭梅萼秀



羣飛之內鳳凰尊有身合下陽城拜無此能招宋玉魂  
公道世間猶我輩未妨歸卧掩柴門

感春

紛紛忙事幾曾閑快上高樓得解顏  
夜月一奩花似鏡春風千疊柳如山  
多情未放芳塵遠漸老難追少日還  
燕子飛來那有意又催團扇入懷間

春去

城郭春風賦式微忽看鶯老燕雛飛  
秧田水滿聞姑惡

樹葉陰濃叫姊歸百歲襟期真索寞十年心事只依稀  
人間我亦無能者華髮蒼顏未必非

聽雨詩

三分春事二分休造化明明百草頭一夜雨聲清似玉  
半牕梅影淡於秋家貧只與詩為伍客去從教睡作儔  
敗衲依然湖海濶老來無喜亦無憂

雨

春禽喚雨屋山呼二月韶光一半無作崇豈逃泥滑滑

原情當坐穀孤孤不應豈翫花梢重已怪荼縻葉子麤  
年去年來誰奈得酒酣擊缶和噫鳴

次韻曾文清公復熱句

百頃滄波望似空鑿冰吾欲浸其中何言雷電不為雨  
須信梧桐自有風子晉臺頭笙遠近西真池面玉丁東  
行賤章奏求清冷乞取玄冥換祝融

熱

夏雲端的似奇峰忽作頽牆四面紅坐想微風過荷葉

夢成踈雨滴梧桐浮家何計來波上舉扇無因出焙中  
三十餘年吟冷語今年吟到水晶宮

次韻賴小弟秋日

遊鱗羈羽任浮沉老大淒然感歲陰風底波紋生別浦  
雨餘山影出踈林殘年不足償多病萬事寧須付有心  
滿眼黃花一杯酒愴懷元弗為聽砧

雪

窮冬那得許奇觀疑怪重衾夜更寒正爛漫花隨處有

不堅牢玉暫時看上章謁帝應留得下令教兒莫掃乾  
岐路揚朱定垂泣東西南北總漫漫

簡鈺朴翁兼簡敬叟二首

雪花梅萼兩婆婆梅雪相催柰老何只合孤山訪和靖  
不應華屋比東坡詩情可喜絲生鬢歸意猶須冰泮河  
林下相尋未岑寂木魚能拍鳥能歌

生機幻法不無神信手拈來却是真雪月梅花同一色  
陳黃蘇老只三人論詩已具頂門眼選勝直賒頭上春

普請西湖作公案與師聊結未來因

遣興

風林縹緲有如無煙樹重重直愛渠  
今我時光能有幾  
古人詩興已無餘又隨弱舫衝潮去  
未結茅齋並水居  
旅館蕭條厨傳少江妃來遺一雙魚

自述

交友凋零似曉星生涯依舊短  
長亭前身房琯仍名永  
今代蘇耽不姓丁兒女成行頭自白  
湖山相對眼終青

還鄉曲調如何唱枯樹無言最可聽

壽陸放翁三首

年事依稀鬢復青看書細字眼猶明池邊自種桃初熟  
籬下曾枯竹再生已覺貂蟬除世念未妨龜鶴伴詩情  
日供薪水門人職準擬金丹點鐵成

邊松坐石日從容故國靈光只我公豈有文章高海內  
獨將身世老山中丹頭躍笋分明異梅萼含椒即漸紅  
千歲斯人要宗主不妨留眼送歸鴻

花間乳鹿笑相迎拄杖穿花導鹿行六子子孫俱宦達  
三山山水亦聰明論詩何止高南渡草檄相看了北征  
帶得門人也僊骨年年來此賀長生

三山放翁先生生朝以筇竹杖為壽一首

信手公侯八十年言歸山澤更臞僊聲名固自蓋天下  
耆老所當留日邊滿腹詩書真我有一門簪笏自家傳  
持來筇杖非無意竊比東坡壽樂全

聞孟良父侍郎解婺印改江東漕再和堆字韻



十行芝檢從天下六月荷花照水開未必便將東節去  
不妨政用此時來安排過關留中奏想像攀轅戀別杯  
遣賀以時非造次索公一笑簿書堆

舟次橫河呈孫季和通守

冉冉歸雲不自閑紛紛暮靄已依山時光盡入艸顏裏  
行色元非草樹間舊臘新正能幾許簾衣糲飯試諸難  
吾生所恨長飄泊又宿汀州白鷺灣

十月二十八日遷入趙氏借屋適有名酒及延

致內黃侯約兄弟共醉賴季有詩次韻一首

黃花已判一年休，短褐無端又去秋。  
環堵肯云原憲病，卜居那免屈平愁。  
交情白髮知難有，故里青山未拙謀。  
酌我橫戈陪季孟，人間棠棣薄公侯。

次韻葛天民

心火調停久不燒，詩書聊以永今朝。  
擬尋筇杖遊還懶，望見梅花意已消。  
原憲既貧應甕牖，顏回所樂是簞瓢。  
歲寒交友今餘幾，留取人間作後凋。

次韻虞叟兄

百嘉萌動春來意兩頰參差少日紅有底心情桃葉渡  
不堪時世柳花風先朝諸老知誰健短歷今年又已窮  
忙事盡歸趺坐裏侯封從付立談中

賴叟弟贈別韻

狙公多詐惑朝三蟻穴何知亦戰酣世上規行無中矩  
人間北看有城南懷哉畎畝終從欲老矣江湖合罷參  
便道阿連同結屋未妨作蠶似春蠶

次穎叟弟送行韻

相傳衣鉢已分明早覺詩含鮑謝情  
心腹於人惟有弟襟懷無我獨非兄  
偶隨江路帆孤往便憶梅牕酒對傾  
歲晚勉旃無廢學他年夷惠看雙清

次韻虞叟九兄七月一日作

日月跳丸逝不留吟蛩得意蛻蟬憂  
終更未伏應無暑望見中元便有秋  
風爽氣先青草動雨涼心共白蓮幽  
誰能跨鶴乘西顥三十三天取次遊

次韻知縣三兄

楊柳依依萬縷絲  
梅花無計與扶衰  
十分酒滿悶如昨  
一半春休雨未知  
安得詩書成保社  
畧容巖壑有心期  
扁舟短策尋常事  
肥馬輕裘我不為

趙黃州寄示詩絕奇次韻

書回聞道讀春秋  
筆削餘功指顧收  
魯國故知人有禮  
周家那得聖無憂  
非君着意扶公穀  
似我何辭贊夏游  
會引青藜校天祿  
毋忘華髮此滄洲

將別穎叟弟

兄弟無聊各數年東堂猶喜聚炊煙  
脩然汝更尋靈照別後吾知憶惠連  
擊汰便應從櫓外看書誰與共燈前  
明朝不待鑿鑿鼓祇有關門及早眠

次韻穎叟弟送行

問道驅車逐帥旗別情惟有弟兄知  
百年同好少張仲舉世誰人似子期  
竹葉尚堪中酒聖梅花真是斷腸枝  
蒼崖縛屋歸來好比計輸君我後時

走筆謝高秘書送示詩文

郊居近郭非寂寞  
蟠竹結茆依野塘  
白屋老人談黍稷  
青雲學士送文章  
藕花開後滿船月  
楓葉落時緣路霜  
年過三紀不稱意  
隨分江湖作醉鄉

和十二弟韻

三伏回頭夢欲醒  
五更風露月逾清  
病餘似鶴精神爽  
老去如僧念慮輕  
邊面只今多勇戰  
人間從昔少閑行  
何當封事天皇殿  
乞借秋霖洗甲兵

奉送呂表叔赴江陰

春風乍入澄江郡最愛君山一點青  
柳外化民安若子鷗邊為政出於經  
每慚舊守勤招喚况識今侯更典刑  
此去交承如借問侯芭貧病髮星星

和岩壑兄九日

華顛可笑挿茱萸兒女歡然競挽鬚  
故國黃花元自好荒臺青草孰為娛  
舉觴感慨悲歌有落帽風流蘊藉無  
粘起半生鐵如意今愚何似古之愚



閑居復遇重九悠然興懷頗謂此節特宜於貧  
蓋富貴者不知若是之清美也因賦唐律呈同

社

風淒日薄鬢毛新歲歲年年樂此辰多少昔賢留賦詠  
大都九日稱清貧甕頭無酒心仍醉離下看山意愈真  
自採黃花供陶謝邇來嘉興屬何人

和陸判院懷祖

柴門臨水對山開日日思君君不來與世相忘書萬卷

於人無忤酒三杯參乎畢竟曾師孔賜也如何敢望回  
況是升沉方自此丹陽聞道好官催

次韻知縣兄

秋聲物物類歌幽旋轉天機屬大鈞一雨薦涼全却暑  
兩湖添綠不生塵黃花又近重陽酒白髮長思五柳人  
急喚西風與湔洗恨無好句逐時新

五和堆字韻呈孟漕

十年但有書題問今日親逢幕府開薤本自迎公始到

桃花應笑我重來何妨邂逅評詩句不用殷勤治酒杯  
辦取籃輿共吟賞石頭秋晚亂雲堆

送陸懷祖之官丹陽

放翁去作水中仙有子生平在眼前鍾愛甚於賢伯仲  
傳家仍自好詩篇肯為堯庫官無小會復公侯澤更綿  
我亦與君非久別秋來須上浙西船

送富知丞之官丹陽

官袍歲久不能青放了銅章却縣丞時事自新醒眼看

古心逾拙白髭生有田有屋寧三仕隨雨隨風又一行  
舉世其誰識公者臨歧何獨悵離情

次九兄秋句

愁多端的似無愁何況周行苦滯留  
薑肱月連銀界曉榆關寒護玉峯秋  
挑燈屢作聞鷄舞看劍長思躍馬遊  
從古封侯欠英傑幽燕終欲笑談休

簡朱子大學士一首

石家曾作送君來建業收書未得回  
只道還家仍款曲

誰知分袂許悲哀冥間孰與論心事世上誰堪共酒杯

昨到帷堂前後奠却瞻喬木肺肝摧

子大父  
喪未除

悼剡姊

庭闈消息判沉沉鴈序殊鄉缺嗣音擇對漫言雙易姓  
何人堪托一分心孤魂寂寞丘中土庶子凋零地下金  
沒固無聊生亦爾忍令行路獨霑巾

張平父逝後寄堯章

入門回首事如麻豈意銘旌落主家有夢合尋茗水路

何心更種馬塍花十年知遇分生死八口饑寒足嘆嗟  
我亦此公門下客只今垂淚過京華

哭唐姑丈縣尉

一官藍綬只虛名兩婦朱絲合不成問我諸姑先冢舍  
別君三日便銘旌高堂寂寞朝昏養側戶垂遺子女情  
欲寫此哀無處所竹風荷雨淚縱橫

懷古

故宮何在綠離離逆順興亡世所知草木尚懷勾踐德

山川仍識夏王悲  
行人月下誰吹笛  
游客街前自買碑  
欲倚闌干問陳迹  
蒼煙白露兩遲疑

八月十五日遊禹祠告成觀

度密穿青且意行  
窮居誰識萬人英  
山當鑿處終須好  
水到平時自不鳴  
夏德真應參太始  
禹功那復告其成  
登臨遺廟秋風裏  
不盡今來古往情

雲門寺詩

重岡落日思依依  
地老天荒閱盛衰  
萬古煙蘿千古寺

唐朝詩句晉朝碑鶴貪清氣隨僧住松引寒聲助客悲  
十載重來衫鬢改笋輿回路獨移時

清涼寺

倚石為城竟是癡春風秋雨柰何其山容似鐵猶能改  
世事如碁未可知廟食孫郎餘草莽龕燈彌勒臘流離  
相逢一笑真難得把筆賡詩記此時

秋日泛鏡中憩千秋觀

病起重來理釣絲扁舟迨及素秋時舊交猶有青山在



幽趣唯應白鳥知  
冉冉年光行老矣  
茫茫世路欲何之  
秦皇酒榼苔封遍  
虛負霜螯左手持

湖山之間有石  
號秦皇酒甕

### 蔣山寺詩

高人元是愛山林  
倦翼猶思息樹陰  
況是先賢遺舊跡  
未妨吾黨得幽尋  
熙豐法在言何害  
革渭人非恨已深  
老我誰能知許事  
自敲亭竹和猿吟

### 松桂堂

素韞歸來痛倚廬  
四時花鳥護幽居  
躬行已達參乎孝

佩服難忘孔子書  
綠蔭千年知不改  
清香奕世豈無餘  
客來已自徵前夢  
未必中堂影像虛

晚步湖橋

吳儂生長鏡湖邊  
湖晚登橋意欲仙  
初見蒼山下紅日  
忽看白月上青煙  
收藏畫本歸吟筆  
應答漁歌送客船  
回首更闌人去後  
玉虹橫浸冷金眠

次韻古梅

獨立枝南萬事非  
歲寒引去合知幾  
伯夷自信西山餓

公望何須東海歸  
笛外數聲空入夢  
江頭一樹忽斜暉  
相看有愧垂垂老  
莫遣無端片片飛

梅花樹下讀高兄詩

尋思秘閣賢郎樣  
一似梅花帶竹枝  
每到君邊作梅想  
却來梅下讀君詩  
崇奎堂暖春風候  
射的山寒夜雪時  
安得居遊君共我  
梅花三友說心期

次韻高似之秘書謝薛書記七月二十七日早  
桂

翠蕤低映鬱金裳昨夜千門萬戶涼蟾小未禁僊掌露  
犀寒先透玉墀霜喚回臨水登山意慙亂薰天撲地香  
歲歲為花愁不徹雅歌欲和底成章

又歎庭前雜花草

十年屢作花開想開盡凡花獨未開祝付化工應念此  
保全根撥待時來為梅自合和羹鼎是菊終須上酒杯  
莫笑淒涼周茂叔牕前生意草成堆

白鷗

白鷗相見忽相猜居士星星似我哉習懶更無詩一句  
澆愁惟有酒三杯看梅傲雪行過去翫月如霜弄影來  
學得平生安樂法等閑不受鬢毛催

飛鳴

飛鳴一鴈帶秋回寂歷黃花傍節開草木不逃天地役  
禽魚常罹網羅灾中年衣食憂妻子道遠舟車勸往來  
未了此生誰料得相逢且覆眼前杯

混迹

桃花新綠漲溪橋楊柳依依弄舞腰二月不堪寒尚在  
一春無那病相撩書編讀半懶重讀爐縮燒殘欣復燒  
老向人間除妄想但思混迹向漁樵

太息

生物趨功日夜忙中年轉覺事茫茫時情何限刀邊蜜  
歲晚偏多葉上霜此岵增悲誰覆載桃梅結實幾青黃  
讀書不辨關門計又着麻鞋走四方

釣魚

白頭波上白頭翁竹葉盃邊竹葉叢  
烹鴈罪因應鴈得  
非魚樂語詎魚同醉醒未覺乾坤異  
起滅懸知水鏡空  
嚴子向來無世念謝郎今日有家風

團扇

團扇光陰有一年楚騷心事忽淒然  
風高碧落無窮雁  
日暮青山欲斷蟬老去極思頑似石  
古來元忌直如弦  
吾廬咫尺金沙地聊與僧伽話夙緣





欽定四庫全書

泠然齋詩集卷六

宋 蘇洵 撰

五言絕句

巖壑兄去歲此時作春前四絕句姿媚可愛然  
猶有遺者因復作一首

縈風送臘回生意遍陳芳似織如絲處春從裏許來  
夜二首

明月耿清夜亂蛩啼草根幽人渾未寢獨自倚柴門

明月在天上流光遍草萊平生一樽酒思與故人開

鏡湖

蒼蒼煙霽塔了了月明山坐久忽不見濛濛杳杳間

舟中

一葉舟中宿風高浪亦高回頭人世事真覺細如毛

杜宇

望帝城中住春宵血沁花何鄉真萬里還憶夢中家

聞鶯

一箇冬青樹鶯聲日日來屋西偏姪姤應是綠雲堆

梅花

清貞表獨立半蕊便風流信有魁天下羣芳未轉頭

贈草

一陣春風起依然故舊情牆根霜下草吾與汝更生

七言絕句

十六日伏覲明堂禮成聖駕恭謝太一宮小臣

敬成口號

三邊兵隙果誰開  
盡道秋高戰馬來  
宗祀告成無一事  
小臣欣覩帶花回

黃門馳馬去如雲  
末後椒房駕玉輪  
驚起秋風無處避  
變成三月萬花春

月中鼓吹日中歸  
重領中宮拜壽闌  
指點都人最歡喜  
今郊恩赦每郊稀

祥煙漠漠上龍旂  
將相侯王護六飛  
一望御街紅數里  
幾人簇擁赭黃衣

燕罷芳園勅御龍  
須臾仙仗簇還宮  
千官過盡塵如霧  
薄暮香鈿滿路中

花枝人面兩欣然  
和氣晴光四接連  
親向官街聽輿誦  
太平天子萬斯年

朝家積累有深仁  
天聽由來不遠人  
且願君王省征伐  
明郊重見四夷賓

端午日宮宴二首

仙裝宮樣一羣羣  
花外花間藹若雲  
羞澁葵榴無舉止

盡傾顏色向南薰

香萱夾和宜男草高下山梔安石榴一樣薰風分五色  
蜀葵林畔按涼州

雜興四首

滿地秋聲鼓吹同草根無賴更寒蛩情知萬事終搖落  
忍見霜林一葉紅

秋衾薄薄換吳綾燈焰無多一半青却憶舊時荆楚岸  
夜深風雨泊船聽

蘭佩其如楚客悲年年誰作感秋辭不應白骨蒼苔後  
更愛西風落葉時

琵琶亭下維舟處水落江空夜雪殘記得長官邀我醉  
縣衙當面玉為山

次韻潁叟弟耕堂雜興六首

莫求名字滿鄉閭且讀平生萬卷書青箬笠邊無不可  
黃金帶後欲如何

繚繞州城帶雨長雨餘雲氣亦飛揚小樓別有幽欣處

時復風吹荷葉香

吳蜀歸來興寄遐天將清氣與貧家雙雙蝶舞宜男草  
箇箇蜂銜附子花

莫怪龐公不入城都緣無事可牽縈客來遇酒飲何害  
客去投床夢亦清

已芸何似與人芸水旱螟蝗不可聞必欲糠粃飽雞鶩  
明年余作勸農文

珍重新來十絕詩末章砥柱不能移因思唐代諸公子



故少撞鐘得意時

原詩云背鄉不過五十日世事如雲  
逐段移客裏念家家念客歸來一似

未行時此未  
章金類唐人

次韻趙去華提幹夏日雜興七首

老子軒冕總相忘  
歸辦芙蓉製作裳  
多少隱淪天下士  
無人知我亦何傷

客醉如何我獨醒  
山空時落澗泉聲  
年來不踏長安市  
贏得詩書一味清

幸是安心無可病  
不曾為米底須歸  
養成乳鹿充神駕

散拾殘雲補道衣

卷六

植立不徒當日計  
顛冥忍受一飢驅  
吟成拙賦何曾拙  
喚作愚溪豈是愚

忽然鏡裏一絲絲  
老却英雄不自知  
夜半閑來看青史  
百年有盡此身危

山外情知更有山  
幾多突兀共巔峴  
一從夢到天壇後  
轉覺丘陵不足看

貧甚誰傳辟穀方  
閉門飲水自徜徉  
無求無欲無魔惱

月白庭空一炷香

茗溪雜興四首

斜風細雨轉船頭  
夜半波平帶月流  
行到下菰城畔望  
水晶宮闕是湖州

美人樓上曉梳頭  
人映清波波映樓  
來往舟行看不足  
此中風景勝揚州

只道還家猶未還  
故山書冊蠹魚殘  
半生不療飢寒苦  
空有詩名滿世間

筆判虛空也太奇古今天下幾多詩虛空判了元無盡  
信手拈來自不知

過金陵四首

豆田無數老鷄飛棗熟菰香稻子垂未說前年那有此  
今年還似去年時

老樹前頭柿葉紅又騎瘦馬立西風江山未必儂能認  
却被江山認得儂

飛鴻渺渺襯蘆葭葭岸紅饒小穗花此是秋光最佳處

江湖何處不思家

高資店裏主人婆萬福官人問訊和安穩在家能幾日  
別時不似見時多

金陵雜興二百首

玉麟堂下柳絲絲過了春風一半時行到水鄉應底事  
黃鶯飛上杏花枝

朱雀街頭觀闕紅角門東畔好春風人家一樣垂楊柳  
種入宮牆自不同

浪說思家不我聽  
蕭齋閑對竹青青  
若為解釋妻兒念  
讀盡樂城道德經

桑林伐盡棗林空  
賣得柴錢飯不充  
明日死生猶未必  
將何纏裹過秋冬

江南隄柳拂人頭  
三月吹花特地愁  
却憶舊時狂李白  
題詩曾遍酒家樓

稍經運瀆過潮溝  
野草開花觸處愁  
二十四航春水滿  
有誰來此上扁舟

有時幽鳥百般啼無數階頭萱草齊第一怕聽泥滑滑  
再三莫放雨淒淒

萋萋登盤朝飯美河魴入市晚羹香應無白傅思春草  
却有東坡賦海棠

碧煙騰上青松樹下有仙人此煉丹丹成不願千千歲  
乞與前生一味閒

歸心突兀不可制一夜夢中行越山驚覺恍然猶是客  
欲隨春色共東還

小小遊車四面紅美人花貌映玲瓏隨車更有郎行馬  
散入鍾山十里松

萬鎗深深待駕臨府藏戈甲庫黃金規恢畫餅翻增弊  
孤負先皇一片心

永巷斜廊開戟闌怕黃寂寞護龍墀深宮不與閒人到  
只許珍禽自在飛

南位之南下曲街畫羅窗戶隔紅梅方方丈石平如掌  
曾是官家拜斗來



小小規模似禁中分明夏禹欲卑宮白頭官吏知年幾

猶指屏風說孝宗

龍屏乃淳熙中降下示必行幸

三山摻別是前年除夜還家翁已仙少小知憐今老矣  
每因得句輒潛然

五陵歌舞換埃塵地下黃金出尚新碑字已漫青草死  
酸風吹殺石麒麟

江風吹面雪漫漫二月東風特地寒四十病身誰役汝  
小車搖兀過長干

去年夜半草軍書  
今歲平安一事無  
且願吾皇千萬壽  
早教車馬會東都

兵戈噉血只空回  
天意人情未可猜  
堪笑當時誰督府  
卷旂夜半渡長淮

青溪閣上看青春  
一度春風一度新  
堪笑南朝江令老  
北朝依舊作詞臣

鐵錢轉手變銅錢  
父老相傳喜欲顛  
未必潁川能若此  
畫圖隨處有香煙

客懷元不問春秋柳綠花紅見亦愁  
第一不如歸去好  
東皋猶幸有鉏耰

清唱聞之妓女家依稀猶似後庭花  
重樓複閣參天起  
不見佳人張麗華

蘼蕪澗邊春草青桃葉渡頭江水生  
女郎到此歌一曲  
不盡今來古往情

伯玉文章一世雄買碑人去更無蹤  
欲尋水館風亭處  
只在西門折柳東

楚囚對泣欲何如江左圖王計策疎風景不殊人自老  
令人更憶管夷吾

去年十二里新亭尅復當時事未成興氣不隨秋露盡  
猶聞神鬼夜論兵

春風動地卷紅旌人在清溪閣上行歌舞洗空亡國恨  
風流太守亦多情

二月風和日暖時淡黃楊柳一絲絲向人無限隋唐意  
猶是橋南楊柳枝

客裏逢春得幾回  
山桃還似舊年開  
玄都道士何曾識  
真箇劉郎去復來

子高去後我方來  
兩地參差笑口開  
賴有尊前似人喜  
為渠想像飲三杯

白石鄱姜病更貧  
幾年白下往來頻  
歌詞剪就能哀怨  
未必劉郎是後身

內官折送御園梅  
歷剌如薪苦不才  
安得昌原帶苔樹  
疎花分得幾枝來

城頭士女出笆籬喜色爭瞻大使旂盡道去年那有此  
今年粥飯不曾飢

石頭城上更高層與客攜壺試一登屈曲江流學秦篆  
春風應是李陽冰

龍虎江山未改形臨高一目但青青春風豈是無才思  
不洗從來戰伐腥

四望庭中四望花青春那屬外人家中間更著垂垂柳  
自倚東風待翠華

白鷺洲前白鷺飛人間還閱幾斜暉  
春風不與蘇郎便浩蕩滄溟一舸歸

雲氣依稀有若無定山山下片帆孤  
青蕪不盡天連水野鴨飛來成畫圖

龍光寺裏只孤僧玄武湖如掌樣平  
更上雞籠山上望一間茅屋晉諸陵

春韭夏菰誰復種綠葵紅蓼尚堪羹  
山存虎踞龍盤勢谷隱猿驚鶴怨名

前日東園一看梅  
昨朝重看杏花開  
從今儘有花時節  
判得從公日日來

白沙翠竹長干寺  
綠水朱樓白下城  
燕子飛來春又晚  
去年曾此看清明

綠陰黃鳥半山園  
謝字王名宛若存  
試問時人兩安石  
却推翁仲不能言

等君日日在高臺  
吹盡楊花君不來  
歸興自濃身尚客  
江南老却賀方回



溝水泠泠韻玉琴  
櫻桃花下宿珍禽  
龍車自向思陵掩  
三十六宮春色深

日日花光亂酒光  
青帘綠樹映紅粧  
今年幸得元戎伴  
三到鍾山共草堂

小繖障羞去復回  
蔣山寺裏看花開  
摩挲拄杖君隨我  
遮莫松間喝道來

花底翩翩燕子風  
杏園何止萬株紅  
亭色最渾如錦  
見說風流似禁中

車如流水馬如龍  
留守遊山似謝公  
夾道歌謠爭指點  
兩行紅旆轉青松

城脚粼粼水一陂  
水邊楊柳映旌旂  
青郊綠野無窮意  
寒食清明三月時

鼓聲打得海棠開  
更向花前舞一回  
傳語流鶯莫相怪  
青春去後不重來

謝公遺冢尚坡陀  
絲竹中年好若何  
亦到舊時攜妓處  
野人行饁婦行歌

白日橋邊白字碑  
康王神道定為誰  
路傍借問無人識  
自滴村醪酹鮮龜

青骨標靈爾許奇  
翩翩白馬去何之  
廟門貼在煙雲上

此是江東第一祠

蔣子文  
莊武帝

白日相思可奈何  
青春三月已無多  
桃花風急鯉魚老  
獨上臺城聽踏歌

香羅初換袂衣新  
除却垂楊不是春  
昨日街頭騎馬過  
眼明猶見賣花人

燕子蜂兒各自忙  
玉魂誰返杜秋娘  
人間抵死無殊麗  
免喚分司御史狂

曉曉飛來載好音  
分明殘夏勝春深  
小窗誰作幽人伴  
惟是爐香共綠陰

羊車洗馬好談玄  
玉立風姿一少年  
不枉當時人看殺  
如今何處覓幽阡

衛玠

桂棹青溪夜泊船  
胡牀歇馬坐江邊  
一聲笛罷不知處

兩不交談意已傳

王微之  
桓伊

五馬浮江一馬龍  
亡何兵滿建康宮  
瓜分鼎峙從來事  
猶說金陵王氣濃

不見烏紗紫綺裘  
至今英氣滿滄洲  
秦淮半夜棹歌發  
明月清天江水流

休論句曲更茅山  
只到棲霞說半年  
暫學僧閒猶未得  
幾時真箇作神仙

三月春歸未是歸  
綠陰端的勝花時  
絕憐首夏清和句  
一字其間幾箇知

青漆樓高制作奇當時純不用琉璃東昏幸自嗤梁武  
不道東昏更可嗤

臨春何在只桑麻法寶叢篁間杏花舊日此間同秦寺  
曾將龍袞換袈裟

陶山松柏已成陰地濶天高不可尋二十年中兒又女  
人間獨自有傷心

尋詩還步小虹橋薄日輕陰叫百勞蘆葉深青荷葉紫  
江湖從此興滔滔

幽草沿階翠織成  
初荷經雨碎珠生  
藕絲道服松毛扇  
獨自花間趁鹿行

南軒門第老袁三  
將業江湖久遍參  
聞說中原太平事  
數行清淚濕征衫

元帥中軍展將旂  
軍中新刺好男兒  
風雲陣法秋毫識  
前日兵興使不知

近刺親兵  
日教八陣

縛屋牽牛旋旋歸  
淮邊綠野盡耕犁  
弓刀武備何曾識  
只是當初田舍兒

州衙三面接秦淮臨水朱門一半開却是浙中無此景  
江鷗飛舞入城來

潮水縈迴御水通垂楊照影綠茸茸天生此地非疏鑿  
未必錢塘似此中

一萬強人犯海陵可憐談笑陷官兵張韓劉岳今何在  
塞上將軍漫有名

多少橫尸疊似樓官人早晚解紅頭淮南已是無聊甚  
行到江東剗地愁



到郡今朝半月日離家兩箇許多時知他阿栢無他石  
憶我何因我得知

城西二里楚金陵吳帝名為石首城如今土塢無青草

笑殺當時所必爭

吳時悉土塢晉室中興  
常為險要必爭之地

觀殿今年七十八往時同飯此齋前梁金華石依然在

屈指重來十五年

致一  
齋

七寶裝成射雉場人間還閱幾齊梁潘妃自踏金蓮去

不見年年春草長

賞心亭前白鷺洲  
淮水東畔水東流  
只知覽古生許恨  
不知身世自悠悠

青春有酒勸不飲  
無乃孤負金陵花  
主人聽客莫怪客  
五更酒醒要思家

江鷗野鴨自保社  
黑黑白白鬪分明  
東邊唼唼西邊舞  
安得吾身似汝輕

淮南劇賊遽如許  
昨日傳聞盡殺之  
罪人斯得勿漫喜  
豈有父母殘其兒

十分生聚九流亡鬼面鴉形仰太倉指望淮南大麥熟  
夫妻子女得歸鄉

暄風吹齋響蒼玉竹石相看便有情提胡盧來沽美酒  
終日撩人不住聲

四十之年又過一春光回施少年人如絲楊柳看如絮  
畫錦堂中又一春

東門草色綠匆匆游女行尋郎馬蹤雞魚不到吳大帝  
籤卜爭求梁寶公

幕府攢眉為至憂公堂三五運兵籌歸之不得吾何用  
獨自方橋看水流

雨花臺下百花香駐馬坡前百草長若還穀熟人民樂  
依舊風流好建康

朱園應是好花開最憶西莊送別杯火急封書寄子大  
少留春色待歸來

出門一步便相疎千里何緣管得渠笑貌聲音等如夢  
十年參學在長途

短褐鍾山不跨驢杖藜橫笛野僧俱雖無字說煩清老  
猶恐龍眠畫作圖

看殺先來所寄書不知病體比何如想應藥裹關心外  
更與兒曹作念渠

夢得當時五絕詩一回吟起一回悲試偷格律無人識  
只恐王家燕子知

曲曲青溪貫大江鴛鴦鸕鶿一雙雙元戎開燕時來此  
城郭山林意兩忘

烏衣巷側長干寺  
暇日閒來看一回  
未覺六朝興廢迹  
淒涼先傍眼邊來

桑間少婦誰能管  
松下孤僧却可憐  
魚躍鳶飛均適爾  
流行坎止不徒然

鍾山窈窕轉龍身  
小屋低松次第新  
試覓定林依舊在  
只無當日讀書人

小蓋高肩翼蔽無  
鍾山寺裏換籃輿  
相逢舉止無羞澁  
一段風流似上都

魏紫姚黃掃地空  
斬新相尚慶元紅  
道人眼界無分別  
只賞東來一味風

二十四番風信催  
郭南間道有花開  
園官欲鬪金錢賞  
名字先供百品來

窗間日日叫提壺  
有酒分明不用沽  
自是老來遊興懶  
日長添得睡工夫

細葉如雲綠漸敷  
玉人晨起換金壺  
就中一朵紫中貴  
除却揚州天下無

四畦芍藥間蔥花五月春風便有涯  
閭巷蕭條生意少  
隔牆誰信內官家

花案粧來日日新  
金陵猶有許多春  
若為造物回芳意  
盡結嘉禾活餓人

始見拖金復散絲  
風吹雨打一枝枝  
靈和殿前好楊柳  
爭如張緒少年時

琪樹三朝種已成  
綠陰回合轉宮鶯  
傷心輦路生春草  
不見素娥花底行



頭上瓶中一萬枝花枝人面兩相宜滿堂將帥文無武  
都載周家既醉詩

江流帶雪少波瀾見說潮頭也怕寒未枉推敲瘦詩骨  
且令澄澈瑩中肝

笑談容易發倉困全活生靈百萬人十五年來山裏坐  
不妨來此越精神

老大驅馳亦已勞移文寧受客嗤嘲人間多少閒田地  
無處令渠著把茅

晉宋齊梁幾帝陵土堆誰解有英靈三臺五省紛紛改  
惟有鍾山只麼青

高世何須更欲名古人於此暢幽情後來同味無王謝  
自折幽蘭上冶城

安石風流苦未遙重來遺跡尚山椒一丘元自無花草  
底事令人覺意消

車聲轆轤馬蕭蕭山色何如換六朝要識相傳風俗在  
居人道得語音嬌

鳳凰臺上鳳凰遊山自青青水自流十載謫仙元不死  
相逢一笑不能休

憶殺當年劉改之風流曾賦秣陵詩如今白骨埋青草  
百詠何因爾得知

平生英俊邢芻父酷愛閩中一卷詩落筆文章有如此  
因何不到秣陵嬉

葛巾裹却葛天民有女閨中號燕春只在西湖不行脚  
金陵風月欠斯人

朱髯五十上南宮下筆猶能太古風  
養就胸中治安策  
老天那復滯渠儂

中年多病才都減無奈金陵景物何  
安得山楹周四者  
肯來相伴此吟哦

毫端真敵萬人軍  
疏筍能空粉黛羣  
機幕晝閒仍弔古  
不勝東閣好郎君

半山松菊略能存  
猶有荆公舊墨痕  
佳處不緣誰屬我  
只應牛首正當門

川原膾膾樹斑斑十里春風一望間  
野馬不羈天地濶孤鴻無奈水雲閒

紅袖紛紛轉翠屏元戎小隊出郊坰  
憑誰為集康衢詠翻作金陵賀太平

闌干三面倚晴暉竹外長江一線微  
太守不來僧自看清涼境界籜龍圍

旋結穹廬作露亭疎枝闌入更輕盈  
今年客思撩人甚欲共梅花笑不成

池亭楚楚更堂堂占得寬閒地一方花竹四時隨處有

縱無人賞亦何妨

行宮養  
榭園

杏堂繚繞過梅堂小竹高松映苑牆白雪飛殘紅霧密  
乘輿不到却淒涼

掃地須臾架屋成風流尤勝拂廬亭吹來一片杯中雪  
看著花枝醉忽醒

亭上施屏或可無江山形勝恐難摹何當窮臘親來此

身作袁安卧雪圖

真宗賜丁晉公此圖專創賞心  
亭以施屏後為好事者取之去

冶城迤邐過清涼城脚連雲一帶長  
佛寺仙宮更游苑  
杖藜知費幾詩章

溪上鴛鴦避畫船  
中妓女列嬋娟  
使君愛日留連客  
同醉江家舊宅邊

曲曲清溪有幾灣  
酒船笳鼓去仍還  
閒情自合頻來此  
只在州衙咫尺間

鍾山閣上看朝曦  
玉作遙山碧四圍  
雲氣茫茫疑是水  
人間無此米元暉

山南山北冢累累僧寺多承舊宅基興廢相仍真若此  
死生常事不須悲

孫陵岡上叢生草太傅墳前沒字碑人世百年元有限

何須功業更巍巍

謝太傅墓前古來只立一白  
碑以其功業之大不容書也

十里城壕盡是花覆舟山下幾人家日長知道遊車倦

自汲新泉喚飲茶

足馬東來說晉元當時一統笑三分如今寄食城隍廟

異代君臣莫更論



周顥宅作阿蘭若妻約身歸寧堵波今日丹青拜荆國  
草堂香火已無多

鳳凰臺上鳳凰遊鳳去臺空水自流惆悵何因見李白  
采江試覓月明舟

青山渺渺水迢迢王氣千年久未消獨客重來覩風景  
江頭猶有女吹簫

甫見梅花方結子即看燕子已生兒青春遊蕩不知返  
留住金陵又幾時

方橋一派水縈紆客散亭空清夜徂二十五聲春點靜  
月明池上柳疎疎

飛梁誰字小垂虹波面蜿蜒去不窮一段風煙無處覓  
鴛鴦鷓鴣在其中

南臺北榭隔飛煙綠水朱橋思渺然月下閒來看簫斗  
傍人指點似神仙

柳思花情分外嬌青樓消息夜迢迢金陵看得新歌舞  
不數吳音共楚腰

竹樹池臺三畝餘  
白雲千載護幽居  
悲涼物色須彈壓  
粉白脂紅却要渠

東冶亭東轉半山  
栽松菴外萬琅玕  
重來鍾阜同僧話  
回顧城中幾客閒

艷杏夭桃日夜忙  
雨餘啼損不成粧  
元和氣春風似  
又引笙歌看海棠

馬軍驍騎試樓船  
見說傾城出道邊  
元帥留臺都賞賜  
一時百萬喝金錢

見日支  
千繪

紙錢吹掛樹枝風積李崇桃白間紅但見牛羊上丘壠  
忽看禾黍出蒿蓬

白下城東送客時同來何事不同歸君歸說似西園柳  
遮莫輕綿一片飛

北門繚繞出東門一處亭臺酒一巡景物欣欣樂知己  
柳容花貌越精神

清明過了日晴佳九十韶光便有涯恨殺東風太豪橫  
夜來吹盡海棠花

一派嬌波入翠溟垂楊只似古來青未能草草歸家去  
怕上勞勞送別亭

城上黃花散漫生溪頭綠樹忽陰成濃春自欲烘人醉  
却憶秋風一味清

輕風濕濕樹斑斑燕乳鳩鳴春又殘門巷狹斜無不到  
有何人似柳花閒

張碩風流隱釣緜漁郎回首漫紛紛杜蘭香去知何在  
惆悵西江一浦雲

扁舟乞得自由身  
爛漫金陵作好春  
桃葉桃根雙姊妹  
清風明月我三人

九十春光即漸休  
莫將雙眼上層樓  
江南歸計無由遂  
一點楊花萬斛愁

月樓誰伴詠黃昏  
剪剪輕風陣陣寒  
獨據槁梧成不寐  
杏花生影小闌干

集句

不及盧家有莫愁  
君恩如水向東流  
從今相送東流後

地下傷春亦白頭

集句

上盡層城更上樓  
綠楊枝外盡汀洲  
蝶銜花蕊蜂銜粉

同向春風各自愁

集句

青帝言歸速  
駕忙荼蘼架底靜  
年芳輕風乍染陰  
陰綠微月低籠淡淡香

壓架荼蘼百萬枝  
月邊花下更漣漪  
三更比屋皆高枕  
如此清涼棄不知

似玉如酥最有情  
一香熏徹萬愁醒  
多應無奈花相惱  
故遶荼蘼架底行

紅芳蛻兮花似霧綠陰徑兮葉生煙獨往來兮差自得  
心境會兮不可言

憶殺仙人白仲都江邊遺迹尚樓居驂鸞翳鳳如容我  
拜作先師定肯無

紫髯何事忽遷都有意宮中號太初他日三軍嫌飲水  
只應翻憶武昌魚

立夏連朝剗地寒看承芍藥倩園官秋千折罷無聊賴  
軒檻周遭綠一般



金城楊柳綠毵毵搖落殊非昔漢南一語莫因人遂廢  
樹猶如此我何堪

桃花園作芳林苑濛汜池通祓禊堂前以驕奢為晉宋  
後無規鑒亦齊梁

小虹橋上看朝曦雲裏鍾山一帶微憶在山中望宮闕  
淡煙朱碧轉依稀

聽箏堂上一畝畝翻手君恩似昔殊按罷金滕應莫怪  
近前閒將使君鬚

一曲清溪一首詩風流千載憶僧施  
小姑溪上平安否  
容我騎魚作伴嬉

方山四面不曾圓中有仙人號葛玄  
見說丹成渾不食  
五雲破洞白昇天

不論城外與城中時節歡然一笑同  
棠棣花殘紫荆老  
可無書札問孤鴻

青山綠水思悠悠見說蛾眉萬古愁  
斗酒百篇能漫浪  
白乎吾與女同遊

蓮花博士去騎鯨鏡曲回瞻一愴情  
少待詩成附河伯  
願加塗乙始流行

高資冢上五樓穹  
先祖曾經相哲宗  
亂後傷心餘石馬  
小孫來補萬株松

八功德水飲一勺  
當下令君熱惱消  
城裏紅塵莫回首  
小屏風嶺好逍遙

安榴朶朶簇巾紅  
數曲闌干掩映中  
尋得冰紈題小草  
淺新還愛綠荷風

前日葵苗匝地青幾何時節與人平旁觀指點荼藤架  
折蕊攀條似隔生

宛轉歌喉一串珠玉人花貌更清姝明年東武南城唱  
試覓源流定憶渠

十八年前蜀道還維舟曾記此龍灣江流萬里元依舊  
藥市蠶叢興未闌

旂幟精明鼓角雄江淮草木盡聞風面門神王鬚如戟  
鼠子無輕怒我公

放散邊頭武定軍賣刀買犢做農人向來憂國多浮議

誰省官家億萬緡

歲省六七百萬緡

表裏江淮四十州稍回飢盜事田疇得公數十分天下  
庶矣斯民疾痛瘳

三月更當臨盡頭昇元閣畔一閑遊偶因花會逢花面

半日僧房得少留

瓦棺寺歲建萬花會遊人無數

揚州風物轉頭非又是葵榴得意時班扇入懷君莫恃

秋來那免棄捐悲

廿載金陵九還往何如三宿在桑間還家更有江南興  
只取囊詩子細看

兵機將畧總如神儒術仍參席上珍補得國風成百詠  
不妨幕府有詩人

閱武堂前楊柳枝如今是隔幾多時至尊屠肉潘妃酒  
問著垂楊總不知

紫雲回薄隱新愁早起鐘聲也是不徧地蔥花兩三畝  
至今人道景陽樓

一門子孝更臣忠廟食分明百世功任是清虛亡晉室  
只留卞壺在江東

附薛師董題金陵雜興詩後八首

舒王不讓杜樊川二十八字今斷絃可怪蘇郎呈好  
手剪花排錦蔣山前

劉郎之後更蘇郎不枉隨人入建康秦水鍾山幾相  
識前年忽識好文章

方泉周四半生癡語輒驚人不自奇渠句却題君集

後要尋梨木共傳之

交朋存沒八篇詩自恨論心獨覺遲也記湧金門外  
別不蒙登賞忽相思

掃階楊柳敗荷風春晚秋初下觀中兩度不能吟一  
句愧君且說事匆匆

定林草木也風騷曾睡山中聽桔槔春雨江湖八年  
事空腸只憶喫絲糕

尊嘉堂上崔嵬老制閫新開欲辟吾又約來遊遊不



得風流輸與五雲蘇

散盡浮軍換鐵絙香煙何處不氤氲蘇郎非是諛人者今日真成說古人

又李璉題金陵雜興詩後十八首

梁家天子抱琵琶淚洒華林御苑花今日聞韶無處所鴈煙蛩雨屬他家

灑灑江波綠更肥蒼煙中有狎鷗飛當年神武今何在老却遺民更不歸

陰山側畔月如霜不為吟猿斷殺腸折得橙花無處  
賞帶枝分與櫂船郎

花開似污天衣血雨過重聞御案香最恨寺奴隲太  
極預先奪我畫梅梁

長干小婦學吹簫樓外閒風弄翠條近得廣陵消息  
未暮潮已過赤欄橋

暮雨瀟瀟郎不歸樽前誰憶舊歌詞望夫烏白濃于  
染葉葉驚秋恨欲飛

愁看幕府夕陽邊那更雞籠在目前跋扈飛揚只如  
此登高安得不酸然

細竹千竿殿影斜龍顏曾此著袈裟寺樓杳杳鐘聲  
過疑有宮娥出晚花

池邊石是南朝石綠染苔花亦可憐今日波平人事  
變白魚猶自躍天泉

離離禾黍已難言空覓楓林與菜園瓦屋半間非辱  
井經幢兩箇即昇元

江水無情碧草春  
北朝留住老詞臣  
子規啼上青楓樹  
為爾離鄉去國人

相君息女小乘僧  
身向西天佛律行  
三尺戒壇秋色緊  
箇中螻蟻亦長生

夜過江左從鸞旂  
從此靈君著漢衣  
春到陰山花似雪  
望鄉臺上鷓鴣飛

南門點檢舊行蹤  
最苦人人認得儂  
羞澁面皮無處著  
橫拖山屐過青松

司馬家兒持酒杯  
天星下吸亦佳哉  
恨渠不便儼牛  
飲那得孟津師  
旅來

孫帝陵傍水最悲  
蔣侯廟下月來遲  
夜深客子心驚  
恐猿掛南朝楓樹枝

雲杪熒熒一塔燈  
覺皇舍利寶煙凝  
山門推上三更  
月似照前朝禮拜僧

南軒隱約夜聲微  
獨詠齊梁綺靡詩  
鬼火對山青焰  
短依稀憶得獨眠時

又弟濱題金陵雜興詩後一首

六朝留寄多多恨一士來歌百百詩驅使春風游筆  
下箇中情景箇中知

